

1 TESALONIKA NE

Paulom dis tcgãyas tc'ãà di sa

Tesalonika ne koe

Téé-cookg'ai sa

Tesalonika ba kò x'áé-dxoom Roma ne di me e, Maketonia koe hàna ba. Paulo ba kò gaa koe xgaa-xgaa, ãem ko Filipi koe guu ka, si kò kereke sa gaa koe tshoa-tshoase (Tsee 17:1-9).

Káí ne qhàò zi di ne kò Juta ne di cauan koe tcãàn tcaoa hãa, a kò Paulom di xgaa-xgaan komsana, igaba ne kò Juta ne tshoa-tshoa a tauan tcãà a ne a ntcoeku. Paulo ba kò Tesalonika koe chùia tcg'òòé, a ba a Berea koe qõò (Tsee 17:10). Gaa koem kò hànaa, a síí Korinta koe tcãà, kam kò Paulo ba gam ka c'ẽem Timoteom koe tchõàn kóm, Tesalonika koe hànas kerekes di téé-q'ooan ka.

Tc'ãà dis tcgãyas Paulom di sa kò Tesalonika ne góá mááèa hãa, gaa koe hãa ne dtcòm-kg'ao nes gha ghùi-ghui tcáó, a sa a ntcàm ne ka. Gane di dtcòmàn hēé naka ncàmkuan hēéthēé di tchõà nem ko qãè-tcaoa máá. Tc'ẽe-tc'ẽesekagu nem ko, kg'òès ãem kò gane cgoa hãa x'aè kam kò kg'òè sa, a ba a kò nxãaska Krete ba gha n-cáma hàà di zi tèè zi ãe kò ghùièa hãa zi xoa. C'ẽes tèè sa kòò máá: “Dtcòm-kg'aom ncēe kò Krestem hàà tama cookg'ai koe x'óóa hãa ba gha kháé chõò tama kg'òèan úúa?” témé sa. Si kò c'ẽes tèè sa máá: “N-cáma ba gha Krete ba gaicara kabise a hàà?” témé. Paulo ba kò ncēm x'aè ba sée a bìrí ne, nqooa hãase méé ne

tséé sa, nqòò sa úúá hãase Kreste ba gha kabise a hàà di sa.

Qaa-qaa sa kg'uia ne:

- ncàmku

- Jeso ba ko gaicara kabise a hàà (1:10; 3:13; 4:13-5:11)

Tcgãyas q'oo koe hàna zi:

- Qãè-tcaoa máákuan hěé naka dqòmkuan hěéthěé e (1-3)

- Nqari ba ko qãè-tcaokagus kg'õè sa (4:1-12)

- Xgaa-xgaan Krestem di hààn di i (4:13-5:11)

- Còò di ghùì-ghui-tcáókua ne (5:12-28)

Qãè-tcaoa-máákuan hěé naka dqòmkuan hěéthěé e (1-3)

Tsgámkaguku zi

¹ Paulo ra a, a Silefano* ba hěé naka Timoteo ba hěéthěé tsara cgoa hãa,

xae ko *ncēes tcgãya* sa Tesalonika dis xg'aes ncēe Nqarim gatá ka Xòò ba hěé naka X'aigam Jeso Kreste ba hěéthěé tsara koe hãa sa góá máá, a ko máá:

Cgómkuan hěé naka tòókuan hěéthěé mée i gatu cgoa hãa, témé.

Tesalonika ne dis kg'õè sa hěé naka dtcòm sa hěéthěé e

² Wěéa tu domka xae ko wèè x'aè ka Nqari ba qãè-tcaoa máá, a ko sixae di còrèan koe gatu ka kg'ui,

³ a ko Nqarim gatá ka Xòòm cookg'ai koe wèè x'aè ka tc'ěe-tc'ěese: gatu kúrúá hãa tsééan dtcòmàn

* **1:1: Silefano** - Silefanom di c'ěe cg'õèa nea Silase e.

di hěé, naka gatu di tsééan ncàmkuàn di hěé, naka gatá dim X'aigam Jeso Krestem koe nqòòan ka tu qarika tées ka hěéthěé e.

⁴Tíí qōe ga tu Nqarim ka ncàmmèa tuè, q'ana xae hãa nxárám tcg'òó tua hãa sa *Gam di tu gha ii ka*.

⁵Sixae di qãè tchõà nea kò gatu koe kg'ui iise cúí hàà tama khama, igaba i kò qarían cgoa hěé, Tcom-tcomsam Tc'ěem cgoa hěé naka kaisa tcoman cgoa hěéthěé hàà. Tu q'ana hãa nta xae kòò ma gatu xg'aeku koe gatu domka kg'õè sa.

⁶A tu a kò hàà sixae hěé naka X'aiga ba hěéthěé di tu serè-kg'ao tu kúrúse. Eěta i kò ma xgàrakuan hãa igaba tu kò Tcom-tcomsam Tc'ěem koe guua qãè-tcaoan cgoa kg'ui ba séèa mááse khama.

⁷A tu a kò ncěem dàòm ka, wèé ne dtcòm-kg'ao ne Maketonia hěé naka Akaia hěéthěé koe hàna ne koe x'ái sa kúrúse.

⁸X'aigam dim kg'uim gatu koe guua ba kò Make-tonia hěé naka Akaia koe hěéthěé cúí síí tama, igabaga i kò gatu di Nqarim koe dtcòmán wèé za ga q'ãàè, nxãasega i gha c'ěe gúù xae gha nxàe sa táá qaase ka.

⁹Gaa nea ko gane ka nxàe, nta tu kò ma hààkagu xae e sa khama. A ne a ko gataga nxàe, nta tu kò ma kúrúa mááseèa hãa nqárian ma tcg'oaragu a Nqarim koe ma kabise sa, a síí kg'õèa hãa a tseegu dim Nqari ba tsééa máá sa,

¹⁰naka tu ma Cóásem nqaríkg'ai koe gha guu a hàà ba ma qãà hãa sa, ncěem kò x'ooan koe ghùì ba, Jesom ncěe hààko xgòàn koe ko kgoara ta a ba.

2

Paulom di tsééa ne Tesalonika koe

¹ Tíí q̄õe ga tuè, q'ana tu hãa, sixae dis dâras gatu xae kò dâra tu ua hãa sa kò kg'amaga di tama sa.

² Hàà tama xae hãa cookg'ai koe xae kò ma Filipi koe xgàràè sa hēé, naka xae kò ma sau-saugase qgóòè sa hēéthēé tu q'ana hãa. Igaba xae kò sixae dim Nqarim koe qarían hòò, a q̄àè tchõàn kgoarasease kg'ui cgoa tu u, ēeta i kò ma kaisa ntcoekuan hãa igaba.

³ Sixae di xgaa-xgaa ne kàma, kana cg'urígám dàòm di, kana kàan di tama khama.

⁴ Igaba xae ko Nqarim ka tcommèa hãa, a xae a q̄àè tchõàn xgaa-xgaan dis tséé sa máàèa hãa khama ma kg'ui, khòèan xae gha q̄àè-tcaokagu ka tamase, igabaga xae gha Nqari ba q̄àè-tcaokagu ka, ncēe ko tcáóa xae kúrúa bóò ba.

⁵ Tu q'ana hãa, wèé x'aè ka xae kò táá q̄àè-qaekuan di kg'uián cgoa hàà cgae tu u sa, a xae a kò táá sixae di tsééan kúrú, c'ēe gúù xae gha gatu koe hòò domka - Nqari ba sixae dim tééa-máá-kg'ao Me e!

⁶ Gataga xae kò khòèan ka xae gha dqomè sa qaa tama, gatu kaga igaba kana c'ēe khòèan kaga igaba.

⁷ Krestem di xae x'àè úú-kg'ao* xae iise xae ga kò kái gúùan qaa cgae tua hãa, igaba xae kò gatu xg'aeku koe tc'aua xae khòè xae e, khòès gas di cóán ko q̄àèse q'òés khama ma.

⁸ A xae a kò kaisase xgónè tua hãa, domka xae kò kg'ónòsea hãa, táá xae gha Nqarim di q̄àè tchõàn cúí máà tu u ka, igabaga xae gha thēé sixae di kg'òèan tcg'òóa máá tu u ka, tseegukaga tu kò sixae

* **2:7: x'àè úú-kg'ao** - Gerika sa ko “apostolo” témé.

koe kaisase ncàm-ncamsa tu u khama.

⁹ Qanega tu q'ana hãa, tí qõe ga tuè, sixae di tséean hêé naka qóm cgoa qgóókuan hêéthêé ka. Nqarim di qãè tchõàn xae kò xгаа-xгаа tu u, a xae a kò ntcúú ba hêé naka koaba ba hêéthêé tséé, táá xae gha gatu ka c'ëean ga qóm ba qgóókagu ka.

¹⁰ Gatu hêé naka Nqari ba hêéthêéa gha ncêes gúù sa nxàea tseegukagu, sixae di qgóóse-kg'áána ne kò gatu *dtcòm-kg'ao tu* koe q'ano o, a tchàno o, a cúí cg'uri ga úú tama khama.

¹¹ Gataga tu q'ana hãa, xae ko ma gatu ka c'ëem wèè ba ma qgóó sa, ãem ko ma cóán ka xòò ba ma cóán qgóó khamaga ma,

¹² naka xae kò ko ma ntcàm, a korè, a ko Nqarim koe ma qarika bìrí tu u sa hêéthêé e, Nqari ba kg'anoa hãas kg'õè sa tu gha kg'õè ka, ncêe ko Gam dí x'aian hêé naka x'ààn hêéthêé koe tcii tu u ba.

¹³ Nqari ba xae ko chõò tamase qãè-tcaoa máá, ãe xae kò kg'ui ba xгаа-xгаа tu u ka tu kò cáàm tshàua máá me khama. Khóèan koe guua hãam kg'uim iise tamase, igaba Nqarim koe guuam kg'uim iise, ncêem tseeguan kaga ii khamaga ma, *Nqarim* ncêe ko gatu *dtcòm-kg'ao tu* koe tséé ba.

¹⁴ Tíí qõe ga tuè, Jutea koe hàna zi kereke zi Nqarim di zi, ncêe Jeso Krestem di zi koe kúrúsea hãa sa gatu koe thêé kúrúsea. Gatu di ne khóè ne ka tu kò xgàràè, ncêe gane kò ma Juta ne ka ma xgàràè khamaga ma.

¹⁵ *Juta ne* ncêe kò X'aigam Jeso ba hêé naka porofiti xu hêéthêé cg'õo, a xhàíagu xae e ne, ncêe Nqari ba qãè-tcaokagu tama ne, a ko wèé khóèan cgoa ga ntcoeku ne.

¹⁶ Xgáè-kg'am xae e ne ko, nxãasega xae gha táá tãá zi qhào zi di ne cgoa kg'ui, ne kgoaraè ka. Ncēm dàòm ka i ko wéé x'aè ka gane di chìbian càùse a cg'oè. I ncēeska Nqarim di xgòàn còò dis ka hàà cgae nea.

Paulo ba gaicara Tesalonika ne dàra kg'oana

¹⁷ Tíí qōe ga tuè, xòm x'aè-coan xae kò gatu cgoa q'aa-q'aaèa hãa, i kò tc'áróa xae gatu xg'aeku koe káà a, tc'ēea xae ka tamase. Xae gaa domka kaisase xgónè tua hãa, a ko wéé qaria xae cgoa x'ãà máá, gaicara xae ga bóò tu u sa,

¹⁸ síí cgae tu u kg'oana xae kò hãa khama. Tíí Paulor tc'áróa kò kái q'oro tc'ēea hãa, síí cgae tu ur gha sa, igabagam kò satana ba xgáè-kg'am xae e.

¹⁹ Kháé sa nxãaska sixae dis nqòò sa, kana qãè-tcao sa, kana x'aian dis cába sa, ēe xae gha X'aigam Jesom kò hàà ne xae gha dqòmse cgoa sa dùú saa? Gatu tama tua?

²⁰ Tseeguan kaga xae ga dqòmse cgoa tu u, tu ko qãè-tcaokagu xae e.

3

¹⁻² Eē xae ko ncēs gúù sa qóma máá xaea hãa sa bóò, ka xae kò nxãaska bóòa tcg'òó, sixae ka qōesem Timoteo ba xae gha tsééa úú sa, ncēe sixae khamaga ma Krestem di qãè tchõàn xgaa-xgaa koe Nqarim dim tséé-kg'ao ba, xae gha sixae cuiaga Atene koe hãa ka. Ncēs gúù sa xae kò bóòa tcg'òó, síím gha gatu di dtcòman koe qari-qari, a korè tu u ka,

³ nxãasega i gha táá cúí-kg'áíá tu ga ncēe zi xgàraku zi domka tééa dìbi ka. Gatu igaba tu qãèse

q'ana hãa, ãe zi xgàraku zim Nqari ba kgoara máá taà hãa sa khama.

⁴Eã xae ko qanega gatu cgoa hãa ka xae kò x'aèan cookg'ai koe ga bìrí tua hãa, hààko x'aè ka ta gha xgàràè sa, si ncëe sa kúrúsea, ãe tu ma q'ana hãa khamaga ma.

⁵Gaa domkar kò, ãer ko bóò si ncëes gúù sa qómá máá tea hãa ka, *Timoteo ba* gatu koe tsééa úú, nxãasega xae gha gatu di dtcòmàn ka q'ãa ka, qàe-qaeku-kg'ao ba gha c'èedaoka qàe-qae tu u, i ga kò sixae di tsééan kg'amaga di i khama.

⁶Igabam ncëeska Timoteo ba kabisea hãa, a qãè-tcaokagu xae e ko kg'uiàn cgoa hààra máá xaea hãa, gatu di dtcòmàn hëé naka ncàmkuàn hëéthëé di i. Gatagam kò thëé bìrí xae e, wèé x'aè ka tu ko qãè-tcaoan cgoa tc'ëe-tc'ëese xae e, a bóòà xae xgónèa hãa sa, ncëe xae ma sixae igabaga ma bóòà tu xgónèa hãa khamaga ma.

⁷Tíí qõe ga tuè, gaa domka xae kò gaxae di qómàn hëé naka xgàrakuan hëéthëé wèé q'oo koe gatu di dtcòmàn ka qgài-qgai tcáóè.

⁸Ncëè X'aigam koe tu kòo qarika tãe, ne xae gha nxãaska ncëeska sònòà dìbi a kg'õèan hòò khama.

⁹Nqari ba xaea gha ntama ma tc'ãòase gatu domka cím tshàua máá! Kaisase xae ko Gam cookg'ai koe gatu ka qãè-tcao.

¹⁰Koaba ba hëé naka ntcúù ba hëéthëé xae ko qarika còrè, gatu cgoa xae ga xg'ae a bóò tu u sa, nxãasega xae gha ãe gatu di dtcòmàn koe tcàòà hãa sa càùà máá tu u ka.

¹¹Ke méé tsara ncëeska gatá dim Nqarim, ncëe gatá ka Xòò ba hëé, nakam gatá dim X'aigam Jeso

ba hěéthěé tsara dàò ba kg'ónòà máá xae e gatu koe xae gha síí di ba.

¹² Gataga méém X'aiga ba gatu ka c'ěea ne koe hěé naka wéé khóèan koe ga hěéthěé kúrú naka i gatu di ncàmkuàn càùse naka kái, ncěe xae sixae ma ncàm tua hãa khamaga ma.

¹³ Nxãasegam gha Nqarim gatá ka Xòò ba gatu di tcáoan qarian máà, tu gha káàn chìbi, a tu a gha Gam cookg'ai koe tcom-tcomsa ii, ěem gha ko gatá dim X'aigam Jeso ba Gam di ne tcom-tcomsa ne wéé ne cgoa hàà ka.

Nqari ba ko qãè-tcaokagus kg'õè sa (4:1-12)

4

¹ Ncěeska còò dis ka, tíí qõe ga tuè, sixae koe tu xgae-xgaasea hãa, nta méé tu ma kg'õè naka tua X'aiga ba qãè-tcaokagu sa, si ncěe sa gaas kúrú tu kos ga si i. Igaba xae ko X'aigam Jesom koe dtcàrà a ko korè tu u, a ko máá: ncěes gúù sa méé tu qarika kúrú, témé.

² X'aigam Jesom di qarian ka xae kò x'áè-kg'áman máà tu u sa tu q'ana hãa khama.

³ Ncěea Nqarim ko ma tc'ěe ga a khama, tcom-tcomsakaguè tu gha sa: nxãasega tu gha cg'áràn koe ncèèsea hãa ka,

⁴ nakam wéém khòè ba tcom-tcomsa a tcommèa hãam dàòm ka gam dis khòès cgoa kg'õè,

⁵ cg'ãè zi tc'ěe-kg'ám zi tcáoá ba ka ncàmmèa hãa zi kúrú ka tamase, cg'ãè tc'ěe ne khòè ne Nqari ba c'úua hãa ne ko hěé khama.

⁶ Nakam gha nxãasega táá cúim khòèm ga ba ncěes gúùs ka gam ka c'ěe ba chìbian kúrú cgae guu,

kana kàa me guu. X'aiga ba gha ãeta ii chìbian wèé ko kúrú ne xgàra ke, ncêe xae nxãakamaga ma bìri tua hãa a ma nxàea tseegukagua hãa khamaga ma.

⁷ Hàà ta gha q'ano tamase kg'òè kam Nqari ba tcii ta a tama khama, igaba ta gha hàà tcom-tcomsas kg'òè sa kg'òè ka a.

⁸ Gaa domkam gha ãe ko ncêe xгаа-xgaan xguì ba, khòem ko méé sa xguì tama, igabam gha ko Nqarim ko méé sa xguì, *Nqarim* ncêe ko Gam dim Tcom-tcomsam Tc'êe ba máà tu u ba.

⁹ Ncêeska gatu ka ncàmkuàn ka: qaase tama ia góá xae ga máá tu u sa; Nqarim ka tu nxãakamaga xгаа-xгааèa hãa, tu ga ma ncàmku sa khama.

¹⁰ A tu a ko tseeguan kaga wèé ne dtcòm-kg'ao ne Maketoniam wèém di ne koe ncêe sa kúrú, igaba xae ko dtcàrà tu u, tíi qõe ga tuè, kaisase tu gha gatà hêé sa.

¹¹ Gataga xae ko thêé korè tu u, kgàea hãas kg'òè sa tu ga kg'òè sa, nakam wèém khòè ba gam di zi tséé zi gam ka kúrú naka baà tshàua ba cgoa tsééa mááse, ncêe xae ma x'àè tua hãa khama.

¹² Naka tua gha nxãasega c'êe ne khòè ne ka tcommè, naka tua táá c'êe khòèan dtcãàsea hãa guu.

Xгаа-xgaan Krestem di hààn di i (4:13–5:11)

¹³ Tíi qõe ga tuè, tc'êe tama xae hãa ãe x'òma hãa ne ka tu gha c'úua hãase hãa sa, nxãasega tu gha táá thòò-tcaoase kg'ae ka, gane ãe nqòòan úú tama ne khama ma.

¹⁴ Ncêé Jesom xg'ao x'óó a x'ooan koe tãea hãa sa ta kòo dtcòm, ne ta ko thêé dtcòm, Nqarim gha gane ãe Gam koe x'òma hãa ne Jesom cgoa óá sa.

¹⁵ Ncëea X'aigam dim kg'uim nxàe xae kom ga me e khama, ncëe ko máá: gatá ncëe kg'õèa a qaùà hãa ta cuiskaga ãe x'ómà hãa ne ka tc'ãà naka síia hãa tite, ãem gha ko X'aiga ba hààm cáím ka.

¹⁶ X'aiga ba gha nqarikg'ai koe guu a kaim dòm cgoa xõa, kaim moengelem dim dòm ba hëé naka Nqarim dim nxãàm dí q'auan cgoa hëéthëé e, ne gha ãe Krestem koe x'óóa hãa ne tc'ãà a ghùè khama.

¹⁷ Nxãaska ta gha gatá ãe kg'õèa a qaùà hãa ta gane cgoa xg'ae-xg'ae a túú-c'õòs q'oo koe hãase ghùè, a síi X'aigam cgoa tc'ãá q'oo koe xg'ae, a ta a gha gaa koe guus ka chõò tamase X'aigam cgoa hãa.

¹⁸ Gaa domka méé tu ncëe kg'uian cgoa qgài-qgai tcáóku.

5

X'aigam di hààn kg'ónòsea máá

¹ Tíi qõe ga tuè, ncëe zi gùù zi gha hàà kúrúse x'aèan hëé naka cáíman hëéthëé ka xae ga góóa máá tu u sa qaase tama.

² Gatú igaba tu qãèse q'ana hãa, X'aigam dim cáím ba gha ts'ãà-kg'aom ko ma ntcùú ka hàà khama ma hàà cgae tu u sa khama.

³ C'ëe ne khòè ne gha máá: “Wèé zi gùù zia qãèse hãa, ta qãè qgài koe hãa,” témé. I gha kúúga cg'ãèan hàà cgae ne, ncãàn úúas khòès ábàn dí thòòan ka ko kúúga hàà cgaeès khama ma, ne cuiskaga nxanagu ana hãa tite.

⁴ Igabaga tu gatú ntcùús q'oo koe hãa tama, tíi qõe ga tuè, me cuiskaga ãem cáím ba ts'ãà-kg'aom ga ma arekagu tua hãa khama ma arekagu tu u tite.

⁵ Wèéa tu ga x'áàm di tu cóá tu u, a koaba di tu cóá tu u khama. Ta ntcùú kana dcùú-qoms di ta cóá ta tama ta a.

⁶ Ke méé ta táá x'óma hãa guu, c'ëe ne khama, igabaga méé ta kókòà hãa, naka qgóósean úúa hãa.

⁷ Eë ko x'óm ne ko ntcùú ka x'óm, ne ko ëe ko nqàre ne ntcùú ka nqàre khama.

⁸ Igaba ta gatá koaba di ta a, ke méé ta qgóósean úúa hãa naka ta dtcòman hëé naka ncàmkuan hëéthëé dxùua ta ko ncèèa máás gúús khama ma hãa, naka taa kgoarakuan dis nqòò sa tcúúa ta ko ncèèa máás cábás khama ma cábá.

⁹ Nqari ba Gam di xgòàn ka ta gha xgàràè ka nxará tcg'óó ta a tama khama, igabaga ta gha gatá dim X'aigam Jeso Krestem koe kgoarasean hòò ka a.

¹⁰ Ncèe kò x'óóa máá ta a ba, ëem ko hàà x'aè ka ta gha nxãasega Gam cgoa xg'ae a kg'òè ka, kg'òèa ta ga hãa kana ta ga x'óóa hãa igaba*.

¹¹ Ke méé tu gaa domkaga ncèe tu ko hëé khamaga ma korèku naka hùiku.

Còo di ghùì-ghui-tcáókua ne (5:12-28)

¹² Tíí qõe ga tuè, dtcàrà tu u xae ko, ëe ko gatu xg'aeku koe tséé ne khòè ne méé tu tcom sa, gane ëe X'aigam koe tc'ãà-cookg'ai tua hãa a ko tchàno-tchano tu u ne.

¹³ Eë ne ko kúró tsééan domka méé tu kaisa tcoman hëé naka ncàmkuan hëéthëé cgoa qgóó ne. Gatu xg'aeku koe méé tu tòókuan cgoa hãa.

¹⁴ Tíí qõe ga tuè, dtcàrà tu u xae ko, a ko máá: Eë ko xg'ám-kg'iaite ne tchàno-tchano, ëe ko sau-cgaese

* **5:10:** *kg'òèa ta ga hãa kana ta ga x'óóa hãa igaba* - Gerika sa ko máá: "kókòà ta ga hãa kana ta ga x'óma hãa igaba," témé.

ne korè, ãe kg'amka ne hùì, naka wèé ne khòè ne koe qádò tcáó ìì.

15 Bòò méé tu naka i táá cúí khòè ga c'ëean kúrú cgae ana cg'ãèan domka cg'ãèan kúrú cgae e guu, igaba méé tu wèé x'aè ka, gatu ka c'ëe ne hěé, naka wèé khòèan ga hěéthěé tu ga ma qãèan kúrúa máá sa x'ãà máá.

16 Wèé x'aè ka méé tu qãè-tcaoa hãa,

17 naka tua wèé x'aè ka còrè.

18 Wèé zi xg'aeku zi koe méé tu Nqari ba qãè-tcaoa máá, ncëea gatu kam ma Nqari ba Jeso Krestem koe ma ncàma hãa ga a ke.

19 Táá méé tu *Tcom-tcomsam* Tc'ëe ba xgàè-kg'am guu,

20 naka tua táá porofitan ntcoe guu.

21 Wèés gúù sa méé tu qãèse bóða tcg'òó, naka ãe qãè ìì sa qgóóa qari.

22 Qgóóse méé tu wèés gúùs ãe cg'ãè iis koe.

23 Nqarim tòókuan dì ba méém Gam tc'áro-tc'aro ka kúrú tu u naka tu wèé zi dàò zi koe tcom-tcomsa ìì: gatu dì tc'ëean hěé, naka tcáóan hěé, naka tc'ároan hěéthěé wèé méé i qãèse qgóóè, naka ia táá cúís chìbis ga sa úú guu nakam nxãakg'aiga síí gatá dim X'aigam Jeso Krete ba hàà.

24 Nqarim ncëe tcii tua hãa ba tcom-tcomsa Me e, khamam gha ãem nqòòkagu tua hãa sa kúrú.

25 Tíí qõe ga tuè, còrèa tu máá xae e.

26 Wèé ne dtcòm-kg'ao ne tu tcom-tcomsas x'obèkus cgoa tsgám.

27 Ra ko X'aigam dì cg'õèan koe dtcàrà tu u, ncëes tcgãya sa méé tu wèé ne dtcòm-kg'ao ne nxará máá sa.

²⁸ Gatá dim X'aigam Jeso Krestem di cgómkuan
mée i gatu wèé tu cgoa hãa.

Kabas Qae-xg'ae sa
The New Testament in the Naro language of Botswana
copyright © 2012 The Bible Society of Botswana

Language: Naro

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-08-30

PDF generated using Haiola and XeLaTeX on 18 Apr 2025 from source files dated 31 Aug 2023

d01ddea0-c0e8-5bc4-86fa-b235639fa99b